

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՊԵՏԱԿԱՆ ԵԿԱՄՈՒՏՆԵՐԻ ԿՈՄԻՏԵ
ՀԱՐԿԱՅԻՆ ԵՎ ՄԱՔՍԱՅԻՆ ՄԱՐՄԻՆՆԵՐԻ ԲՈՂՈՔԱՐԿՄԱՆ
ՀԱՆՁՆԱԺՈՂՈՎ**

ՈՐՈՇՈՒՄ N 67/27

ք.Երևան

31 օգոստոսի 2023թ.

Հայաստանի Հանրապետության պետական եկամուտների կոմիտեի հարկային և մաքսային մարմինների բողոքարկման հանձնաժողովը (այսուհետ նաև՝ Հանձնաժողով), քննության առնելով ներմուծված ապրանքը որպես անձնական օգտագործման ապրանք դիտարկելու և առանց մաքսազերծման տրամադրելու վերաբերյալ ֆիզիկական անձ Հարություն Սահակյանի դիմում-բողոքը՝

ՊԱՐԶԵՑ

1. Բողոքարկման առարկան, դիմում-բողոքով բերված փաստարկները և ներկայացված պահանջները

Ֆիզիկական անձ Հարություն Սահակյանը (այսուհետ նաև՝ բողոքաբեր) հայտնում է, որ ս.թ. հուլիսի 24-ին համացանցի միջոցով՝ EBAY-ից, գնել է իր անձնական օգտագործման համար LAUNCH CRP123X ավտոմեքենայի սխալները կարդացող մինի-համակարգիչ, որի համար վճարել է 141 ԱՄՆ դոլար և քաշը կազմել է 1.3կգ: Նախապես բողոքաբերը զանգահարել է ՀՀ Մաքսային թեժ գիծ և տվյալ ապրանքի համար մաքսային պատասխանատու աշխատակիցը հավաստիացրել է, որ այդ ապրանքը մաքսազերծման ենթակա չէ:

Սակայն այդ «ԼԱՈՒՆՉԸ» տեղափոխող ԳԼՈԲԲԻՆԳ Ընկերությունը ՀՀ տեղափոխելուց հետո տեղեկացրել է, որ այն ՀՀ Զվարթնոց օդանավակայանի մաքսային կողմից առգրավվել է և պահանջում են այն մաքսազերծել:

Հարություն Սահակյանը գնացել է ՀՀ Զվարթնոց օդանավակայան մաքսային, այնտեղ տեսուչ Նարեկ Սարգսյանը, առանց ներկայացված բոլոր փաստաթղթերը ուսումնասիրելու, ասել է, որ այն պետք է մաքսազերծել: Ներկայացված փաստարկներին, որ այն չի գերազանցում ՀՀ Կառավարության կողմից մաքսազերծման համար սահմանված չափերը, ասել է, որ ինքն է որոշում, թե որ ապրանքն է մաքսազերծվում, որը՝ ոչ: Նման անընդունելի մոտեցումից զայրացած գնացել է աշխատակցի անմիջական ղեկավարի մոտ, սակայն նա տեղում չի եղել և աշխատասենյակի մոտ գոյացել է մեծ հերթ:

Այդ իսկ պատճառով բողոքաբերը նշում է, որ ստիպված գնացել է ՀՀ ՊԵԿ Արևմտյան մաքսատուն-վարչության պետ՝ Գ. Մինասյանի մոտ՝ իր գործը օրինական ճանապարհով լուծելու

համար: Սակայն նույն անհարգի մոտեցումը ցուցաբերվել է իր կողմից, առաջարկել է ետ ուղարկել այդ «ԼԱՌԻՆՉԸ»:

Ֆիզիկական անձ Հարություն Սահակյանը խնդրում է Հանձնաժողովի միջամտությունը Զվարթնոյ օդանավակայանի մաքսայինի կողմից թույլ տրված անօրինականությունները կասեցնելու, իր կողմից գնված, իր անձնական օգտագործման համար LAUNCH CRP123X ավտոմեքենայի սխալները կարդացող մինի-համակարգիչը՝ գինը 141 ԱՄՆ դոլար կամ 54,849 ՀՀ դրամ, քաշը 1.3կգ, համաձայն ՀՀ Օրենսդրության՝ առանց մաքսագերծման տրամադրելու իրեն և անցկացնել ծառայողական քննություն ՀՀ ՊԵԿ Արևմտյան մասքաստուն-վարչության պետ Գ. Մինասյանի և մյուսների վերաբերյալ՝ քաղաքացիների հետ տարվող աշխատանքներում անհարգի վերաբերմունքը հետագայում բացառելու համար:

2. Դիմում-բողոքի քննության համար էական նշանակություն ունեցող փաստերը

Ֆիզիկական անձ Հարություն Սահակյանի կողմից ՀՀ է ներմուծվել ավտոմեքենայի սխալները կարդացող մինի-համակարգիչ:

Ներմուծված խնդրո առարկա ապրանքը մաքսային մարմնի կողմից չի դիտարկվել անձնական օգտագործման ապրանք, ուստի առաջարկվել է ներկայացնել ապրանքների հայտարարագիր, որը Միության Օրենսգրքի 104-րդ հոդվածի 2-րդ կետի համաձայն՝ իրականացվում է հայտարարատուի կամ մաքսային ներկայացուցչի կողմից:

3. Բողոքարկման առարկային վերաբերվող իրավական կարգավորումներ և եզրահանգումներ

Եվրասիական տնտեսական միության մաքսային օրենսգրքի (այսուհետ՝ Օրենսգիրք) 2-րդ հոդվածի 46-րդ կետի համաձայն՝ «անձնական օգտագործման ապրանքներ» դրանք ապրանքներն են, որոնք նախատեսված են ֆիզիկական անձանց՝ ձեռնարկատիրական գործունեության իրականացման հետ չկապված անձնական, ընտանեկան, տնային և այլ կարիքների համար և Միության մաքսային սահմանով տեղափոխվում են ուղեկցվող կամ չուղեկցվող ուղեբեռով, միջազգային փոստային առաքանիներով առաքման կամ այլ եղանակով:

Օրենսգրքի 256-րդ հոդվածի 4-րդ կետի համաձայն՝ Միության մաքսային սահմանով տեղափոխվող ապրանքներն անձնական օգտագործման ապրանքների շարքին դասելն իրականացվում է մաքսային մարմնի կողմից, ելնելով՝

1) Միության մաքսային սահմանով տեղափոխվող ապրանքների մասին ֆիզիկական անձի բանավոր կամ գրավոր դիմումից՝ ուղևորային մաքսային հայտարարագրի օգտագործմամբ.

2) ապրանքների բնույթից և քանակից.

3) ֆիզիկական անձի՝ Միության մաքսային սահմանը հատելու և (կամ) այդ ֆիզիկական անձի կողմից կամ նրա հասցեով ապրանքները Միության մաքսային սահմանով տեղափոխելու հաճախականությունից:

Օրենսգրքի 457-րդ հոդվածի 3-րդ կետի համաձայն՝ Օրենսգրքի 256-րդ հոդվածի 4-րդ և 5-րդ կետերի դրույթները չեն կիրառվում՝ մինչև Եվրասիական տնտեսական հանձնաժողովի այն

որոշումն ուժի մեջ մտնելը, որն ընդունվել է նշված հոդվածի 5-րդ կետին համապատասխան, և որով սահմանվում են Միության մաքսային սահմանով տեղափոխվող ապրանքներն անձնական օգտագործման ապրանքների շարքին դասելու չափանիշների քանակական բնութագրերը:

Մինչև Եվրասիական տնտեսական հանձնաժողովի նշված որոշումն ուժի մեջ մտնելը համապատասխան իրավահարաբերությունների կարգավորումն իրականացվում է՝ «Մաքսային միության մաքսային սահմանով ֆիզիկական անձանց կողմից անձնական օգտագործման ապրանքների տեղափոխման և դրանց բացթողման հետ կապված մաքսային գործառնությունների իրականացման կարգի մասին» 2010 թվականի հունիսի 18-ի համաձայնագրի 3-րդ հոդվածի 1-ին կետի դրույթներին համապատասխան, համաձայն որի՝ ֆիզիկական անձանց կողմից մաքսային սահմանով տեղափոխվող ապրանքները անձնական օգտագործման ապրանքների շարքին դասելն իրականացվում է մաքսային մարմնի կողմից ռիսկերի կառավարման համակարգի կիրառմամբ, ելնելով՝

-տեղափոխվող ապրանքների մասին ֆիզիկական անձի դիմումից (բանավոր կամ գրավոր՝ ուղևորային մաքսային հայտարարագրի օգտագործմամբ)՝ վերոնշյալ համաձայնագրով սահմանված դեպքերում,

-ապրանքների բնույթից և քանակից,

-ֆիզիկական անձի՝ Միության մաքսային սահմանը հատելու և (կամ) այդ ֆիզիկական անձի կողմից կամ նրա հասցեով ապրանքները Միության մաքսային սահմանով տեղափոխելու հաճախականությունից:

Համաձայն ԵԱՏՄ հանձնաժողովի 10.05.2010թ. թիվ 257-րդ որոշման՝ ապրանքների հայտարարագիրը լրացվում է էլեկտրոնային եղանակով (Trade.gov.am) «ՀՀ Արտաքին առևտրի ազգային մեկ պատուհան» համակարգի «Ապրանքների հայտարարագիր» բաժնում:

Եվրասիական տնտեսական հանձնաժողովի խորհրդի 20.12.2017թ. թիվ 107 որոշման 6-րդ հավելվածով նշվում է անձնական օգտագործման ապրանքներին չդասվող ապրանքների կատեգորիաների ցանկը:

Եվրասիական տնտեսական հանձնաժողովի խորհրդի 20.12.2017թ. թիվ 107 որոշման 6-րդ հավելվածի 12-րդ կետի համաձայն՝ անձնական օգտագործման ապրանքներին չդասվող ապրանքներին են դասվում ԵԱՏՄ ԱՏԳ ԱԱ 8426-8430, 8433-8442, 8444 00-8449 00 000 0, 8453 -8464, 8465-ից, 8466, 8468, 8474-8480, 8486, 8514, 8530, 8534 00, 8535, 8545, 8548, 9024, 9027, 9030 և 9031 դիրքերում դասակարգվող մեքենաներ, մեխանիզմներ, սարքավորումներ (բացառությամբ սիզամարգերի, զբոսայգիների կամ սպորտային հրապարակների համար նախատեսված հնձիչ մեքենաների, կենցաղային սկավառակային սղոցի):

Ելնելով վերը նշված իրավանորմերի դրույթներից, ուսումնասիրելով փաստական հանգամանքները՝ Հանձնաժողովը գտնում է, որ ներմուծված ապրանքն իր բնույթով չի կարող համարվել անձնական օգտագործման ապրանք: Ուստի ներմուծված ապրանքը որպես

անձնական օգտագործման ապրանք դիտարկելու և առանց մաքսազերծման տրամադրելու վերաբերյալ ֆիզիկական անձ Հարություն Սահակյանի դիմում-բողոքը ենթակա է մերժման:

4. Եզրափակիչ մաս

Ելնելով քննության արդյունքներից և ղեկավարվելով Հայաստանի Հանրապետության հարկային օրենսգրքի 20-րդ բաժնով, «Մաքսային ծառայության մասին» Հայաստանի Հանրապետության օրենքի 37-րդ հոդվածով, Հայաստանի Հանրապետության պետական եկամուտների կոմիտեի հարկային և մաքսային մարմինների բողոքարկման հանձնաժողովը

ՈՐՈՇՈՒՄ Է՝

Ներմուծված ապրանքը որպես անձնական օգտագործման ապրանք դիտարկելու և առանց մաքսազերծման տրամադրելու վերաբերյալ ֆիզիկական անձ Հարություն Սահակյանի դիմում-բողոքը մերժել:

Սույն որոշումն ուժի մեջ է մտնում իրազեկելուն հաջորդող օրվանից:

Սույն որոշմանը չհամաձայնվելու դեպքում այն ուժի մեջ մտնելու օրվանից երկու ամսվա ընթացքում կարող է բողոքարկվել դատարան:

ՀԱՆՁՆԱԺՈՂՈՎԻ ՆԱԽԱԳԱՀ՝

ԿԱՐԵՆ ԹԱՄԱԶՅԱՆ